



宛陵先生文集目錄卷第三十八

贈袁大監

和達觀贈別

蕪湖阻風

和達觀文鑒見懷

讀月石屏詩

自此皇祐五年五月至京後

暴雨

和宋中道喜至

齊國公主挽詞

招隱堂寄樂郎中

貸米於如晦

送渭州劉太保

送張洞晏相辟

送張著作宰蘄水

和瘦盆

太廟致齋荅韓舍人

送張著宰上元

劉原甫觀相國寺

和裴如晦秋懷
送張寺丞青幕

送徐秘校廬州監酒

子華江南安撫
周仲章潤州倅

弟著作宰南陵
和鄰幾有菊無酒

五知堂
贈陳孝子庸

和原甫過相國寺淨土院

李端明席上花燭
送李祠部滑州

送王正仲長官
廨後木芙蓉

傷驥
陳丞相燕息園

和普上人古琴
和胡舍人見啼

題三教圓通堂
設膾示坐客

杜挺之新得和州
鄰幾邀食餛飩

幽廟
十月十八日

送鄞宰王殿丞
金陵與張傳師飲

阻風寄刁安國
阻風秦淮

江上遇雷雨
登瓜步山

宛陵先生文集卷第三十八

贈袁大監

人以祿爲榮當知身所重祿榮身且勞豈要權衡
用達人唯止足曷顧百鍾俸今朝西山歸芝木不
須種莊生逸老言此必久已誦矩法况自持推年
心可縱

依韻和達觀禪師贈別

平生少壯日百事牽於情今年輒五十所向唯直
誠既不慕富貴亦不防巧傾寧爲目前利寧愛身
後名文史玩朝夕操行蹈賢英下不以傲接上不

以意迎衆人欣立異此心常自平譬如先後花結
實秋共成趙壹雖空囊鄭子豈其卿二人貧且隱
高譽動天京我蹟固尚賤我道未嘗輕力遵仁義
塗曷畏萬里程安能苟榮祿擾擾復營營近因喪
已除偶得存餘生強欲活妻子勉焉事徂征徂征
江浦上鷗鳥莫相驚

蕪湖阻風

春風任惡花自笑白浪不愁頭已白戢戢大船江
浦邊崑崙五兩誰非客

依韻和達觀文監金雨中見懷

出浦候波平石尤風未止密雨長蒲牙輕泥隨燕
子寒侵遠客衣山岸起新痕水各各欲還山還山能
幾里

讀月石屏詩

自此起皇祐三
年五月至京後

余觀二人作詩論月石月在天上石在山下安得
石上有月蹟至矣歐陽公知不可詰不竟述欲使
來者默自釋蘇子苦豪邁何用強引犀角蚌蛤巧
擗析犀蛤動活有情想石無情想已非的吾謂此
石之蹟雖似月不能行天成紀曆曾無纖毫光不
若燈照夕徒爲頑璞一片圓溫潤又不似圭璧乃

有桂樹獨扶疎常娥玉兔了莫覓無此等物豈可
靈祗以爲屏安足惜吾嗟才薄不復詠略評二詩
庶有益

暴雨

雲薄風回雨點麓日腥土氣隨吸呼蒸然襲汗猶
揮珠屋瓦裂響波生渠森森斗覺涼侵膚毛根
癩瘡重匣軀已知燠寒變須臾雷電不止投笑壺
槐端漏影日向晡馬蹄莫惜行泥塗

和宋中道喜至次用其韻

予從江南來見子東浦榛問子何不治子兄游洛

瀕子素樂文字而復養慈親去年始陞朝差差陪
縉紳今也與吾肩行立笑語頻未經鬢髮改喜預
班綴新思如曩時會浩飲不計巡往謁持約史文
辭媿彬彬謂將一乘粟欲敵千箱困然而澤中蛇
時得龍一鱗况復周孔教幸逢舜禹辰又究志所
之茲學豈不臻誰其起子者視子爲席珍趨韓亦
已工比孟猶欠淳慎勿驚怪竒怪竒世多擯吾慙
遼東豕未見西狩麟汨汨塵泥間曷辨玉與珉昨
來忽有知所索非所循使焉轉磨衡安得目不眴
誠聞苑囿美難遺麋鹿馴自惟體衰茶寧堪事艱

辛宜收蹭蹬迹却返江湖濱浸脰水活活漫灘石
磷磷垂釣紅鬚登舉袂白羽振以此全吾性胡能
往問津非同子少年柯葉正萋萋

齊國大長公主挽詞二首

賢行聞當世尊隆異故常每令夫結友不爲子求
郎夜月初沉海姑星忽墮潢臨門親祖祭悲吹起
脩岡

魯館當年盛秦臺此日遙龍歸終合劍鳳去不聞
簫挽曲方傳薩行輻竟奠椒空餘漢官屬泣送馬
如潮

招隱堂寄題樂郎中

日哦招隱詩日誦歸田賦未嘗見芸人勇拋冠冕
去今聞緱山陰身退効踈傳一旦從犢車歡言友
田父復來釣澗邊誰問袁公路

貸米於如晦

舉家鳴鵝鴈突冷無晨炊大貧丐小貧安能不相
嗤幸存顏氏帖况有陶公詩乞米與乞食皆是前
人爲

送渭州劉太保

月黑見旄頭芒角漸西向八月邊草黃胡人馬初

壯無奈我兵雄方爲漢偏將嘗聞登壇人亦未免
得喪得爲凱歌還饒鼓喧亭障干蹄使椎牛百甕
令設醯喪乃軍之羞節制由處上進退從其呼何
能求必當二事非已專願思古挾纊

送張推官洞赴晏相公辟

送子居大梁閔中乃閔外往者邊事繁秦民被災
害今聞獨豐穰逮埃無動旂相公欲動勞請以臨
都會多選天下才佐佑如何賴決疑有全策何必
用著蔡雖病君強行寶刀仍喜帶豈是爲俗儒空
言事夸大

送張著作器宰斲水

予聞楚山竹肉好髮亦勻隴上風雪飽石根莓苔
皴搜林前羽橫吹龍子愁水濱作邑尚簡易豈必蹈
昔人願爲李長賦安用瑤與珉

和癭盃

物以美好稱或以醜惡用美惡固無然逢時乃亦
共弃則爲所輕用則爲所重道聞癭木器愛賞豈
歌頌定應初得之買不論官俸饋面生光輝貯飲
發狂縱坐欲置於傍行欲挈以從其形何險怪曾
不因執種凹凸本自然出縮非闢縫薄才難究窮

詆訶茲實恐

太廟致齋荅韓舍人簡

齋舍隔墻東蕭蕭槐樹風聲顏雖不接翰墨遽能
通未說涼堪飲唯愁賦少工此烏知素拙試與問
楊雄

送張著作孟侯宰上元

天衢車馬跡急若機上梭義雖平生篤不越一再
過夫子累顧我言歸泛長河得邑美建業風流猶
可歌依稀江令宅秋草應更多五題誰復詠鍾蔣
與差我

劉原甫觀相國寺淨土楊惠之塑像吳道

子畫又越僧鼓琴閩僧寫真予解其說

吾儕來都下將踰三十春不聞此畫塑想予得亦
新茲寺臨大道常多車馬塵設如前日手晦昧已
惑人曷分今與古曷辯偽與真閩緇圖鳳姿越釋
彈龍唇但知五彩爛徒謂五音淳孰識商聲高孰
驚眸子神不能評譜品索玉翻得珉二君才調高
言若羽翮振將令尋常工千歲傳不泯

依韻和裴如晦秋懷

老葉已足蠹風振猶在柯高高低低聲切切感我

多不念四散飛尖圓競相磨當茲思再春宛然同
俟河莫驚衡山鴈莫問洞庭波徒聞漢武帝獨有
橫汾歌

送張諷寺丞赴青州幕

朝廷久清明賢相出賢牧賢牧又選賢森森備官
屬是以邦政脩良農播嘉穀上無租賦逋下有困
廩蓄往者河朔飢奔送劇鳥鷺富公鎮青社有來
咸鞠育病者調藥劑起者飼饘粥老稚四十萬瘦
骨生壯肉鄉縣將遣歸田園皆可復爲之置長犁
爲之置黃犢旣完身上衣又付橐中粟庭下再拜

辭望城皆感哭他人守一方境內猶不足至今趙
魏間食飲常酌祝富公離山東寇盜頗任觸堂堂
高平公德業人所伏幙府得才謀螻蟻不勞撲上
體憂勤心掃滅得神速張侯三十餘瑩若無玷玉
八字分濃眉純漆點雙目昨日奉辟書氣貌寧近
俗言從必磊落落事果無出縮他時爲書功誰惜十
毫禿

送徐秘校廬州監酒

淮南秋物盛稻熟蠡正肥况身爲酒官醇酎飲不
非儻觀衆人醉徒自使世譏與君伯氏好試以此

言歸

韓子華江南安撫

韓侯出持節志在撫黔黎縣官負弩迎刺史躍馬
隨千里宣德澤煦如春風馳寒潮不起浪怙怙威
馮夷借問何致耳試聽將所爲立車呼父老勞以
哀矜詞我從大明宮天子親諭之憂汝歲屢凶吏
不恤汝疲已輸又索糶困索無子遺此非陛下意
恐使汝輩疑疾苦汝告我不憚爲汝治父老必喜
拜如餒得飼麋我稱此大是一一無不宜南方二
十州歡聲無幼耆壺漿擁大道婦女闖短籬行聞

江漢間復有宣王詩

周仲章通判潤州

昔過京口山斷崖如鞏洛抱谷黃芹泥百文聳垠
堦山嶺與江面地脉水可度欲鑿無淺泉孰云南
土薄君爲別乘去便比北州樂已免卑濕憂仍離
鴟鴞惡况逢休明時秋堞罷嚴柝夜愛寒江潮月
臨甘露閣置酒發浩歌萬里波欲卻霜蟬肥可釣
水鱗活堪斫縱飲不須休未應滄海涸終當笑楊
雄窮壁常寂寞更知首陽人薇蕨事亦錯不若阮
步兵醉鞍伸兩脚太守必吾徒儻能時就酌

弟著作宰南陵

新買紫騮馬欲歸清弋江去彈琴鴈獨來認鳥鳧
雙索實收盈篋濃醅熟滿缸弟兄相憶否風燭舊
西窓

和江隣幾有菊無酒

種菊將飲酒菊開酒無有雖不負爾目且已負爾
口昨日三四人淡坐飢腹吼徒與哦其傍誰能置
升斗當時陶淵明籬下望亦久幸賴白衣人不愧
采盈手悠然事頗同必竟醉則否

五知堂

代人與任少傅

履道坊中白家宅五橋莊北晉公堂昔年二老曾
相樂今日五知名獨光舉事是非都不問接花時
節暫能忙清尊雅曲易爲厭自有圖書列在傍

贈陳孝子庸

康州水邊龍母墳草樹蒙蒙起風雨五色五蛇時
往來野鼠不穴墳上土嗟哉異類猶厚親豈彼人
兮忘恃怙果生陳子孝且仁終日劬劬在民伍天
清天順感其和嘉禾駢枝立如股遐鄉歎慕爲爾
隣太守欣言出吾部中州士人傳以夸照頑燥孽
良有補唯時火德君道明粵南祝融孝所生若然

寧獨一陳生築埃表廬從此數

和原甫同鄰幾過相國寺淨土院因觀楊
惠之塑吳道子畫聽越僧琴聞僧寫宋賈

二公真

青槐夾馳道方轡下麒麟
謁來游紺宇歷玩同途
巡吳畫與楊塑在昔稱絕倫
深殿留舊迹鮮逢真
賞人一見如宿遇舉袂自拂塵
金碧發光彩物象
生精神歲月雖已深
竒妙不愧新驚嗟豈無意振
播還有因乃知至精手安得久
晦埋二僧感識別
請以已藝陳或彈中散曲或出
丞相真覽古仍獲

今未枉停車輪

李端明宅花燭席上賦

百兩禮將陳王家集上賓
花光濃照席燭艷暖迴
春已接冰壺潤寧辭翠罍
醇自慙持短調重對玉
堂人

送李祠部知滑州

自古重名器未嘗輕授人
煌煌東郡守燦燦兩朱
輪父祖繼居此恩榮誰與隣
秋風度河水馬足不生塵

送王正仲長官

汴渠沂復沁自可見遲速來時遲有糧去恨遠無
穀有糧安計程無穀不遑宿霜高萬物枯源水縮
溪谷黃流半泥沙勢淺見感澳千里東歸舩何日
下清瀆澹澹風雨寒長汀嘯鴈鷺將投孤戍遙四
顧危檣獨強語慰妻奴多虞賴僮僕到家秫已收
綴樹橘始熟折腰無慙陶懷遺焉媿陸我方羨子
行送望不移目

解後木芙蓉

託根地雖卑凌霜花亦茂物稟固不遷人情自爲
陋幸與時菊開誰嗟發孤秀楚人塞木末已見離

騷就

傷驥

駑驥同一軌遲速能幾里當其被問時舉策數耳
耳馳騁心獨存豎抑頭不起空傳八駿名未遇穆
天子

陳丞相燕息園

少仕旣勤勞暮節念君息小車辭漢庭緇衣賦衛
國廣園樹嘉木鳴鳥來野色京水魚可縉東陂鴈
可弋豈不有秦聲酒酣歌在側寧同扶風人自去
北山北

依韻和普上人古琴見贈

獨賣絲為絃九竅珥為軫彈風松颼颼聽水流泯泯欣者舉袖舞悲者欲涕墮若此輒動人干時固能準虞舜今在上南薰思無盡

依韻和胡舍人見唁

西垣閣老號文雄辭體能兼兩漢風絳帳舊生雖授學灞陵歸將已無功校文豈論居三上賦分由來本下中不恨早朝秋雨急猶陪鴛鷺大明宮

題三教圓通堂

處中最靈智人與天地參其間有佛老曷又推為三共以圓通出誠明自包含排楹墜文礎煥采塗朱藍而將且吾儒復欲籠彼聃二徒不自曉恬若均笑談越鳥不巢北代馬不嘶南固亦辨殊土麟鷲唯時堪

設臚示坐客

汴河西引黃河枝黃流未凍鯉魚肥隨鉤出水賣都市不惜百金持與歸我家少婦磨寶刀破鱗奮鬚如欲飛蕭蕭雲葉落盤面粟粟霜葡萄為縷衣楚橙作蓋香出屋賓朋競至排入扉呼兒便索沃腥酒倒腸飮腹無相譏逡巡餅竭上馬去意氣不說

西山薇

杜挺之新得和州將出京遺子薪芻豆

魯公馬病不可出陶令言拙徒扣門舉家食粥焉
用怪但願漉酒巾常存長安休儒勝方朔水邊漂
母哀王孫王孫功名立四極方朔談干至尊我
才不及三二子摧藏自愧趨權閭前時永叔寄秉
粟一秋已免憂朝昏今君益之薪與菽老馬病骨
生精魂昨聞新拜歷陽守玉國久客虱處禪都水
借船輕復淺急趁寒汴流渾渾耳清眼明見野色
一聽江鶴醒若噴餘糧滯鈍不暇惜均於朋契惟

義博設如河酒膠在步縣邑亦足供雞豚却嗟我

甌有時厚莫與太倉黃鼠論

汗鄰邀食餛飩學書謾成

老肌瘦腹喜食熟况乃十月霜侵膚與君共貧君
餉我吹葦不學屈大夫前時我膾斫頰鯉滿坐驚
睨卒笑呼誠知舉筋意淺狹一餐豈計有與無

幽廟

老狐依叢祠妖橫起百怪巢梟助鳴聲穴兔資狡
獮巫給神靈言俗奉飲食拜三年空禱祈萬疾無
愈差臙臊日已熾疑畏誰敢懈近者勇丈夫發揭

窟乃壞始時驚其狂今盡喜其快龙茸毛尚存獨
使尾徒大廟貌更一新願以邪為戒

十月十八日

霜梧葉盡枝影疎井上青絲轉轆轤西廂舞娥艷
如玉東楮貴郎才且都纏頭誰惜萬錢錦映耳自
有明月珠一為轆轤情不已一為梧桐心不枯此
心比情日相近卷起飛泉注玉壺

送鄞宰王殿丞

君行問埒鮫殊物可講解一寸明月腹中有小碧
蠓生意各騰騰黔角容夫夫願言寬賦刑越俗火

疲憊

金陵與張十二傳師賞心亭飲

但嗟識君遲不恨春風惡風惡舟未前置酒共談
譁漁歌還浦頭斜日下洲角明朝渡江去相望便
成昨

阻風寄刁安國

江風裂瓦鳴浦口驚浪作君駕何不來客心空寂

寞

阻風秦淮令狐度支寄酒

春風不獨開春木能蹙楚浪花高似屋江船百尾泊

深灣鐵纜千環繫長軸遠客今朝愁未平主人贈
榼飲還足前時共論酒可禁急世救弊且勿速我
今正得盃中趣効陶種秫置心曲

江上遇雷雨

雷從燕尾來雨到江心急挂帆中路時望浦前舟
入聲喧釜豆裂點疾盜爾立蕩搖魚鼈腥恐懼兒
女泣稍聞人好語出顧岸已及蘆州有同行言信
氣吸吸

登瓜步山二首

瓜步山頭朝堂因魏武興亡歸從赤壁事去憶
陵軍井藏雲杪林根擁石稜微風認江水細甲幾
千層

山上濃雲合江南暴雨來將歸林下嶺中路遇風
雷心速灣猶遠行遲伴屢催舟師添繫纜兒女望
人迴

宛陵先生文集卷第三十八

宛陵先生文集目錄卷第三十九

韓子華遺冰

宣三館觀瑞蓮

和吳冲卿秋蟲

陌上二女

無悔

弔瑞新和尚

和冲卿新葺南齋

江鄰幾遷居

聞刁景純侍女瘡已

景純期原甫飲

永濟倉書事

和幾道暑夜懷寄

和孫侔鴈蕩

赴景純招作將進酒

薛簡肅夫人挽詞

送淮南孫提刑

詠原甫林檎花

送張寺丞富公

送淮南李轉運

重送楊明叔

送董秀才之汝陰

送張子野知渝州

送楊子充知資陽縣

送司馬君實鄆州倅

送陳殿丞知韶州

寄岳州孫屯田

大愚

目錄終

宛陵先生文集卷第三十九

韓子華遺冰

六月侍臣方賜冰我賦得之從友朋開盤一見水
玉璞置坐百步無青蠅熱膚收汗起疹粟不有消
渴同茂陵杜子每思赤脚踏韓老嘗苦如飢丞慙
無二公才與學享此足與俗輩矜

二十二日起居退聞宣三館諸公觀瑞蓮

來朝十二旒將出未央殿微聞嘉蓮開獨許侍臣
見嘉蓮其如何曾樓擁霞片玉輦下天泉日晏不
知倦恩魚應亦喜跳沫珠欲澣誰憐與衆歸博士

臣疏賤

依韻吳冲卿秋蟲

梧桐葉未老露滴玉井牀秋蟲如里胥促織何苦
忙苒苒機上絲入夜爲鼠傷織婦中夕起投梭重
徊徨那聞草根擊膏八然肝腸天子固明聖措意
如陶唐下民唯力穡不見田疇荒豈知哀歛人替
責矜健強所以機中女心關日月光年年租稅在
聒耳信已常哀哉四海人無不由此戕吳侯當聽
時靜坐愛初涼方將同佳人歡樂舉盃觴繁鳴雜
蟻蟻感愴情不皇況蒙朝家恩兄弟登俊良意慮
宜恤物以慰衆所望今者秋蟲篇不異七月章

陌上二女

素手寒窳羅柔纖明春萸轉眄動桂葉陽語啓瓠
翠阿姊金盛珠阿妹縑籍圭吹香襲行路豈獨下
蔡迷

無悔

婦人未四十容貌已改前男年踰五十嗜慾固自
偏勿以色敵心色衰心易遷勿以愛恃久愛移久
多愆明鏡知惡看何須妬嬋娟

弔瑞新和尚

示化何悲戚俱焚只衲衣已隨原火盡空見野雲
飛寫影誰方丈栽松舊翠微當年度江鉢弟子獨
將歸

依韻和吳冲卿新葺南齋

移病新秋散直廬自將僮僕治前除已栽楚客江
邊草不學嚴陵瀨上漁紅穗拂欄何舊粲綠叢無
水亦蕭疎從今有月君須飲況與朋親共舍居

江鄰幾遷居

聞君遷新居應比舊居好復此假布囊家具何草
草我貧無囊假來僮笑欲倒所笑還往人生計不
足道非用僮僕知雖貧自懷寶

聞刁景純侍女瘡已

前時君家飲不見吹笛姬君言彼娉婷病瘡久屢
治隔日作寒熱經時銷膏脂醫師尤飲食冷滑滯
在脾次聞有鬼物水火陰以施乃因道士逐實得
鬼所爲手洒桃枝湯足學夏禹馳呵叱出門牆勿
復顧嘔遺今雖病且已皮骨尚尪羸豈暇理舊曲
未能畫蛾眉當期重相見風月臨前墀

景純以侍兒病期與有甫月圓爲飲

古龍水底鳴素秋江雲不飛江買愁金陵舊族天

祿游家有善笛能娛侯憶侯前年罷姑孰自買蘄
州飽霜竹腮肥項瘦裁青玉鑽鑿商聲五音足牛
渚磯邊夜泊時平波不起月中吹老魚跳舞龜出
泥雌蛟怨泣椎鼉悲新還中都人罕知交親奏酒
隔簾幙丹脣一發妙響馳醉客欲見寧非癡昨夜
劉郎辭玉卮主人勸謝當勿疑渠今纏瘡尚苦羸
他日海蟾圓未遲圓未遲涼肝脾畏肝熱生腦脂
生脛脂不得窺

求濟倉書事

神武立四極收兵銷衆豪輸糧來萬國積庾下千
艘貔虎肥於豢麒麟老向槽中州無殍餓南土竭
脂膏黃鼠群何畏青鳩喙且噉古梁生菌耳朽堵
出蟻螯樹腹懸蛇蛻絲窠挂鳥毛塵埃雖自汨朱
墨亦能操直宿愁風雨經年弊褐袍仲尼猶作吏
我輩勿爲勞

依韻和礪守王幾道屯田暑夜懷寄

地厚天青冥故交榮謝并何當一壺酒以昔相與
傾君今二千石來往戀山楹山楹夜對月孤懷豈
忘情貴者幾何逝賤者幾何生夏簟且安寢明星
上東城

依韻和孫侔鴈蕩二首

海邊巉絕有蒼山怪怪竒竒物象閑百丈素流珠
噴薄千重紅樹火回環遠尋僧寺石屏下時遇野
人雲屋間今日京華見君說便思輕舸出東關
鴈蕩高高路莫通銜蘆秋翼入雲峯山頭水濶不
見影崑下沙平時有蹤千仞柱天何歛閃萬工揮
筆漫輕濃葛巾蠟屐未能著空羨青蒼重復重

赴刁景純招作將進酒呈同會

日光如鎔金湧上滄海流一朝復一朝鑄出萬古
愁大鑪石破碎世事安得休明月只照夜時時如

屈鉤常娥與玉兔擣藥何所瘳大忠不自治更被
鍛蟆偷我思天地間二物最取尤措置尚如此細
故曷用惡著書欲傳道未必如孔丘當時及後代
見薄彼耽周功名信難立德行徒自脩勞勞於我
生帶挂同贅疣不如聽隣笛就其舉盃甌笛不煩
教養酒不煩取求從今醉至春從夏醉至秋勿禁
雞狔魚間薦鶉鴈鳩况多南方物醜腥美咽喉計
較無以過試共阮籍謀

薛簡肅夫人挽詞四首

蕭公當貴日小吏引輕軒四德有遺美六親無異

言立孤傳世嗣垂軌在閨門澮水終歸柎秋雲逐去魂

嘗聞求子婿不似怒甘公莫以昔人比比皆爲當世
雄家聲新慶續國禮舊恩隆必與齊姜墓千秋蠅
樹同

冠劍將朝去常知好直言戒辭猶可託先見久應
存瑩白冰兼玉清芬蕙與孫堂塗從此閉何日卜
丘原

美合周詩播魂先岱嶽歸空堂遷舊榻素月照靈
衣珠翠香沉匣丹青影挂幃百年親戚淚併作露

霏霏

送淮南提刑孫學士

淮南木老霜欲飛順令恐縱諸侯威命書絕出邸
掾謁已見衣繡車迎歸樂莫戒聽筵莫迂清如蟾
蜩夜吐暉不須久作平反吏自合橫經親帝闈

八月三日詠原甫庭前林檎花

秋蠹無完葉踈叢有瘁莖偶來庭樹下重看露葩
榮衆自守常理獨開偏見情從今數霜月結子尚
能成

送河陽通判張寺丞從富公辟子諒

張公愛神鐔佩服近玉麟又拭華陰土光彩一以
新百里無惡獸千里無冤人今朝欲何之去上延
平津應當出匣飛騰波決秋旻

送淮南轉運李學士君錫

王都重兵廩命使總八方淮南舟車衝三楚籠利
長惟時有才彥數計等桑羊八月賜詔行朱旆揮
大航汴湍入秋漲東鼓下鏜鏜今日發大梁明朝
過睢陽睢陽授經地父老認道傍同業八十人或
貴或爲郎先生歿大官弟子無荷囊乃知詩書
傳要在明三綱隋未聞仲淹來學去佐唐唐初

稱名臣鮮及杜與房親凡慕義人專門起輝光我
聞房杜流已顯惟王張雲漢幾萬里星宇爭耀
芒歸來立螭頭莫愛魚稻鄉君錫與王伯庸張端明同在睢陽希文講下

重送楊明叔并序

行而有以贖者助所不足也車馬子有裘服子有
貨貝子有所可贈者詩言爾故先爲七言以送將
以道彼美而樂往也子不爲重邀予以規又作
五言應其請

君將會稽去舊蹟可以嬉子因狀其美贈子臨路
岐子不以爲樂但願有以規噫吾豈無說畏子未

及禪既求不語子吾曷忍子欺前年子渡淮夜泊
洪澤湄有鬼稱使者來告風波期子時再拜謝乃
被隣船嗤遠巡鬼復至復附船家兒怒彼慢嗤士
明當使驚危船兒傍舷迴走若一足夔翌日各解
舟出浦風動旗子獨乘安流彼受橫浪吹此事非
子傳焉得他人知昨逢令弟蘊備述果不疑越俗
素重鬼慎勿啓其私子口有仁義子腹有書詩子
嘗談三道怪語固未宜近聞蘇才翁問子辟者誰得
非外戚侯子怒已翠眉今我倘得罪甘與蘇同之
送董傳秀才之汝陰

杜燕已歸盡秋鷺猶繞林久爲梁國客不起灞陵

心徒步赴朋館遠遊無橐金江君丈人意莫入楚

鄉深

鄰幾常
止此行

送張子野屯田知渝州

舊居苕溪上久客咸陽東歸來得虎符馳馬向巴
中歌將聽巴人舞欲教渝童况嘗善秦聲樂彼渝
人風忠州白使君竹枝詞頗工行當繼其美首寫
勿怱怱

送楊子充愈知資陽縣

家近古臨邛聞多木蘭樹其人龍袞芳馨乃有相

如賦成名三十年始見列駕鷺出為資陽長秋
鬢已點素天子愛黔黎歸與蜀民諭當時同洛陽
過半作丘墓屈指今所存無如君寂故唯酒可餞行
不飲車空駐

送司馬學士君實通判鄆州

君家世典史君復續祖為蘭其臺未成書汶陽從已
知將行我何贈一誦溪堂詩聞彼多蒲魚可助鼎
與危在昔阮嗣宗初赴東平時醉扶乘蹇驢圖畫
猶可披今見國門外徒馭不驅馳十里馬一歇五
里車一脂不得同鴈群相送過寒陂

送陳殿丞知韶州

從益

韶州使君行請問韶石名傳聞古帝舜石上奏九
成鳳皇為之下朱鳥不復鳴舊祠亡玉琯四序安
得平至今南方熱臘月裘服輕事外共廢酒曲江
風物清

寄岳州孫屯田

琳

從來洞庭好都在岳陽樓明月千里寒光三萬
秋年華有時盡風物不知休太守怜予句應如沈
隱侯

大愚

大愚不量能品藻輒已出朝以軻爲同暮以立爲
四其人豈鷹鷂雀鳩蛤化五日指鹿危二世師歆造
新室雖云詐力尚終日殞斧鑕

宛陵先生文集卷第三十九

宛陵先生文集目錄卷第四十

寧陵阻風雨

新霜感

過淮

淮陰

杪樞樹

就野人買兔

使風船

淮陰侯廟

又平律一首

入滿浦

許發運見過

登泰山日觀峯

重過瓜步山

發長蘆江口

龍女祠祈順風

西施

金陵三首

丫頭石

漫書

閑家

雪中發江寧浦

登采石山

効阮步兵

阻風宿大信口

早發大信口

黃池月下共酌

泊昭亭山下

送鹽官劉少府

和酬杜太師

和簽判謝雨過

和正仲重臺梅花

讀重臺梅花詩

和重臺梅花

和荅正仲見贈

正仲靈濟觀重臺梅

和文鑑喜予往還

和達觀穎師

題邵氏園居

嘗正仲惠撥醅

和正仲寄酒

春雨

春夜聞雨

早春田行

目錄終

宛陵先生文集卷第四十

寧陵阻風雨寄都下親舊

晝夜風不止寒樹嘯未休人言雨殺風雨急風未
柔獨扶慈母喪淚與河水流河水有冬竭淚泉長
在眸予生五十二再解官居憂昨者母疾亟骨肉
相聚愁橐中無一錢緩急何可求母當臨終時囑
我貧莫羞隨宜具棺殮厚貸賢人頭死事定無益
生償且無由泣涕聽母言心腸如劍鉤小子雖不
令長養息曷酬旦夕期速平後事勿預謀願母強
藥食更延百千秋固云莫望我我竟已飛遊語畢

忽奄逝撫膺呼裂喉未能一物備迷亂將安投艱
窘見風義乃有令朋儔致賻或錢帛最力李與劉
廷老禁省及石渠奠助日不周裴楊乞銘蓋文篆
原甫古復道如晦潭饒兩大艦朝索暮泛浮哀憐荷君子
才德慙未脩三日違大梁兩宿此遲留聊書同些
挽試託楚人謳

新霜感

前日衣上露今日衣上霜我母魂何之膏火糜我
腸隔棺三寸地如在萬里鄉嗥呼不聞聲飲食空
置傍昔時憂我寒縫衣紉線長線長必絮厚要與
風霜當又每恐我飢羹雁自調嘗此身內外間莫
得頃刻忘舉衣不忍着舉筋不下吭一念百感生
欲問天蒼蒼

過淮

侍親數數來浮汴護櫬迢迢復渡淮旨蓄曾無御
寒具細君唯有隱居釵月銜遠入魚銜浪潮退長
汀蚌閣崖素服華顛色相似青銅不忍見形骸

淮陰

天下滔滔久厭秦英雄蛇鼠竄荆榛少年豪橫知
多少不及沙頭一婦人

杪樞樹 李邕有碑

杪樞古樹常占歲在昔曾看北海碑今日四方
俱大稔不知榮悴向何枝

就野人買兔

霜濃草白兔初肥蒼鶻調拳獵犬携剩付錢刀買
庖餽不須緣徑更求蹄

使風船

清淮直上水連天坐着高帆後復前自是乘風有
遲速不由人力愛爭先

淮陰侯廟

韓信未遇時忍飢坐垂釣歸來淮陰市又復逢惡
少使之出胯下一市皆大笑龍蛇忽雲騰蛭蝓豈
能料亡命乃為將出奇還破趙用兵不患多所向
孰敢標功名塞天地翦刈等蒿藿于今千百年水
上見孤廟鷺銜葭下魚相呼尚嗚叫高皇四海平
有酒不共酌古來稱英雄去就可以照

又平律一首

漢家天下將廟古像公圭百戰自忘楚一時空王
齊鄉人奏簫鼓舟子賽豚雞不改寒潮水朝平暮
復低

入滿浦

馬頭攬岸斗鷲尾泊船齊風送寒潮急雲藏晚日
低逢人多楚語問客煮吳雞難覓枚臯宅蒼葭處
處迷

許發運待制見過夜話

許公運國儲歲入六百萬上莫究所來下莫有利
怨十年無纖之功利潛亦建昨除侍從官聊為磨
世鈍比於以舌得此豈愧物論較量多少間未足
數劉晏大計苟窘費曷不使預筭欲倍即能倍但
勿惑謗訕擾民可以奪食官可以虛鼠要付與權衡
一切出果斷嗚呼任智力長短固有限制財猶制
兵太甚則生亂公譬淮陰侯多多自益辨我今聽
其談夜去為扼腕書之俟采詩咨訪不可緩

登泰山日觀峯

并序

予泊瓜步山下夢王景彛問韋應物日觀峯詩予
即誦知語不屬謂景彛曰當為檢韋集覺而函閱
韋集無此題尚記夢中所誦首句云晨登日觀峯
遂續補之

晨登日觀峯海水黃金鏗浴出車輪光隨天行無
蹤正視刺我目攢集如劍鋒照耀萬物與磨滅萬

物凶草木既無命必聞石間松當時一避雨安得
大夫封人而苟不遇抱簡誦六龍

重過瓜步山

魏武敗忘歸孤軍處山頂雖憐江上浦鑿崑山巔
井豈是欲勞兵防患在萌穎我昔常登臨徘徊愛
晴景片雨西北來風雷變俄頃疾行下危磴屢脫
不及整霑濡入舟中幼子喜抱頸問我適何之衣
濕不太冷昨暮泊其陽月黑夜正求鴈從沙際鳴
旅枕自耿耿平明夾槽去廟樹聳寒嶺舉首生
白雲飄搖水中影

發長蘆江口

篙師施工相整衣龍女廟中來宰豨野祝擊鼓降
神語老鴉銜肉上樹飛長江無風平似削兩槽夾
舸行將歸南國山川都不改傷心慈姥舊時磯

龍女祠祈順風

龍母龍相依風雲隨所變舟人請予往出廟旗脚
轉旗指西南歸飛帆疾流電長蘆江口發平明白
鷺洲前已朝膳竹根盃玦不欺人世間然諾空當
面

西施

濺濺溪流散冉冉石髮開一朝辭浣沙去上姑蘇
臺歌舞學未穩越兵俄已來門上子胥目吳人豈
不哀層宮有麋鹿朱顏為土灰水邊同時伴貧賤
猶摘梅食梅莫厭酸禍福不我猜

金陵三首

恃險不能久六朝今已亡山形象龍虎宮地牧牛
羊江上鷗無數城中草自長臨流邀月飲莫挂一
毫芒

金陵逢曉雪撩亂逗雲來已失烏衣巷還成白玉
臺山盤猶隱見江轉似相回一聽高樓笛依稀認

落梅

每入秦淮口風波更不憂重看後庭樹還起舊時
愁故老都無有遺蹤莫可求何人能識意白鷺在
寒洲

丫頭石

此碑也在金陵斷石岡上有吳文帝字焉

丫頭石雖斷文字未全訛年筭赤烏近書疑黃象
多幾時經霹靂異代見干戈更與千秋看松煤定
費摩

漫書

蒲葵兩錢扇漫寫未嫌輕老媪持將去無端色不

平

閔冢

吳天冊中

盜發廣陵冢及扉開石樞中環走徹道高濶可通
車五尺銅鑄人執兵冠服朱壁石刻位號列侍幽
宮隅殿將將軍屬侍郎常侍俱啓棺見其尸鬚班
顏未渝白壁十雙藉雲母一尺鋪黃金塞耳鼻千
歲不腐枯生為貴與富死與人未殊後世逢暴禍
雖久將焉如堯舜及周孔豈不固形軀

雪中發江寧浦至采石

泊舟斫枯葭歎火蕪岸傍冒嶺雲冥濛漫江雪飛
揚拖水脩網漉出水朱鬢曠然起遠懷風旗轉
危檣千帆共辭浦棹錯逆水翔落星始前瞻瞬目
已後相鯨魚何時來揚花吹茫茫沙草不可辨鴈
立知汀長山頭化石婦忽變素質光豈復願聞笛
莫逢桓野玉

登采石山上廣濟寺

船從山下過直上見僧軒繫纜登磯石緣崖到寺
門短籬遮竹澹危路踏松根却看滄江底帆歸烟
外昏

效阮步兵一日復一日二首

一日復一日一朝復一昏來新去成故俯仰變涼溫
有貴即有賤未若賤常存驛牛暮孤犍黃犬悲東
門禍福相為基損益不復言吾祖入吳市應龍非
伏轅

一日復一日一晨復一夕四序相盛衰三辰運光魄
下上有常理憂患何時易先爛泣金燃先焚歎新
積但願遠世網焚爛不能責麒麟出非時未免西
狩獲鷗鳥浮洪波心已預海客

阻風宿大信口

東梁如印蠶西梁如游魚二山夾大江早暮潮吸

噓解舟辭姑熟速欲還吾廬風逆未可前泊浦近
煙墟波中事網罟乘月多夜拏冰灘聚鳴鴈霜葭
正踈踈是時昂畢中曠渺天地虛靜坐人已眠我
慮又洗如自起取美酒獨酌邀蟾蜍蟾蜍射白光
入盞亦躊躕醉來不解舞欲攬嫦娥去昔對謫仙
人此意復在予既醒裂尺素立作數行書寄與青
山家精靈其有諸

早發大信口

犬吠知舩解村墟尚閉門霜泥粘纜尾水閣潮
痕撇撇鷓鴣去纖纖舩艇昏梅湖到不遠寄信向

田園

黃池月下共酌得池字

將歸謝公郡喜見阮家兒但對月和水那能酒似
池衰形疑鏡照葆鬢怯霜吹宿鴈不堪託鄉人知
未知

泊昭亭山下得亭字

雲中峯午午潭上樹亭亭久作大梁客貧留小阮
醒灘愁江舸蒞祠信楚巫靈日暮渡頭立山歌不
可聽

送鹽官劉少府古賢

我祖南昌尉時危棄去仙劉郎從宦日天子治平
年燥茗山中火熬波海上煙吳民不為盜唯此撓
君權

太師杜相公篇章真草過人遠甚而特獎
後進流于詠言輒依韻和

杜詩嘗說少陵豪祖德兼誇翰墨高蘇李為奴令
侍席鍾王北面使持毫

子美祖雷言嘗自謂我詩可使蘇李為奴我書可像鍾王北面

郊麟作瑞唯逢趾天馬能行不辨毛一誦東山零
雨句無心更學楚離騷

依韻和僉判都官昭亭謝雨更廣教見懷

賽雨何從事高情苦愛山謝公聯句後

謝公有昭亭賽雨與何從

事聯句詩惠遠過溪間笑處巖相答歸時酒在顏端憂

守窮巷無力共躋攀

依韻和吳正仲屯田重臺梅花詩

桃花已滿秦人洞杏樹猶存董奉祠莫恠寒梅獨多葉只緣樂府有新詩

讀吳正仲重臺梅花詩

此樹在重濟王廟

楚梅何多葉縹蒂攢瓊瑰常惜歲景盡每先春風開龍沙雪為友青女霜作媒託根迤廟堂結子助鼎鼐吳侯奉吳人筆力高崔嵬但詠同姓木予

非梁棟材

依韻和正仲重臺梅花

芳梅何蓓蓓素葉吐層層近臘寒猶勁先春氣已承冷香傳去遠靜艷密還增有意常欺雪無功合鑊冰早煙籠玉暖凍雨浴脂凝漢女新粧薄燕姬瘦骨稜壓枝唯恐折簇萼似難勝神物終來護江鄉未解矜獨竒心豈欲寄遠客何曾不見黃鸝度寧防粉蝶凌月光臨更好溪水照偏能畫軸開雲霧宮刀翦絲繒都無筆可銜莫信巧堪憑丹杏塵多雜夭桃俗所稱故林嘗渴望大庾更愁登重和

陽春曲
聲辭猥媿仍

正仲見贈依韻和荅

平生好書詩
一意在抱槩
既無缺雲劍
身世遭黜黥
耻游公相門
甘自守恬淡
妻孥每寒飢
內愧劇剜憐
時賴二三友
乞米慰窮慄
雖然情懷惡
亦未廢誦覽
如負會稽辱
欲雪效嘗膽
作文持與人
百不得一領
聖猶嗜好殊
獨取菖蒲歎
我愚希六義
將使鬼神感
譬彼捕長鯨
區區只持罾
青天挂虹霓
躑躅不可擊
太華五千仞
妄學巨靈撼
幸且同蛙黽
近樂在井坎
蒼髮况種種
存非衛髦髮
吳俠琅玕姿
而來視翫
菟鳳皇五色毛
曷羨未翅蝻
染夏有正采
安用此淺黥
乃知井度陂
萬頃見澄澹
孟軻患為師
薄劣亦何敢

正仲往靈濟廟觀重臺梅

玉盤疊捧溪女歸
魚鱗作室待水排
竹間山鬼入夜啼
古廟夕閉誰啓扉
屈原憔悴江之沂
芙蓉木蘭託興微
賈誼未召絳灌擠
香草嘉禾徒菲菲
曾無半辭助訶譏
國風幸賴相因依

依韻和昭亭山廣教院文鑑大士喜予往還

山暖春煙重
林昏古寺藏
溪流過曉漲
嶺樹見新

行馬去侵雲蹟風來襲野芳禪衣頻斗數蠟屐莫
趨蹌飛鼠時過擲飢禽或下顏憑欄何所適望堞
正相當捧膳溪童絜啣花鹿女香登臨無險絕不
似畏巖墻

依韻答達觀禪師頴公

霜露每懷感江山空復情老便林室靜坐馱巷童
聲盡日都無語逢人亦強迎浮生過半百安用此
虛名

題姑蘇邵氏園居

積水夫差國閒居魯叟心石科雲起潤城角竹連

池鷺入池塘晚花開島嶼深應當効踈傳不惜橐
中金

嘗正仲所遺撥醅

屈原自著漁父篇舖糟不及漁父賢世無功名多
浪死劉伶阮籍于今傳邇來獨酌邀明月唯有青
山李謫仙謫仙歿後幾百年市樓日沽千萬錢沉
酒豈少當道眠文字不見空月圓吳均之孫何我
憐雙壺貯醅持置前豈乏阮李詩與瘴淺飲強對
春風妍

依韻和正仲寄酒因戲之

上字黃封誰可識偷傳王氏法應真清淮始變醅
猶薄句水新來味更醇欲擬比酥酥少色曾持勸
客客何人紅梅雖是吾家物老去無心一醉春

酒本王九傳
法於山陽

春雨

春雨霽霽鳴百舌林花淡淡洗燕脂眼前耳底催
久殺不醉三盃大是癡

春夜聞雨

風味正不寢驟來寒氣增簷斜滴野籜窸缺搖
春燈孺子睡中語歸人行未能前溪波暗長定已

沒灘棧

早春田行

風雪雙羊路梅花溪上村鳥呼知木暖雲濕覺山
昏婦子來陂下囊壺置樹根予非陶靖節老去愛
田園

...

...

...

...

...

...

...

...

...

...

...

...

...

...



